



2. februar 2010

UPA 2010/144

Inatsisartut Suleriaasianni § 35 naapertorlugu apeqquteqaat aallaavigalugu oqallisissiaq imaattoq matumuuna saqqummiupparput:

Nunaqavissut isertitaqarnikkut periarfissaasa annertusarnissaat siunertaralugu takornariaqarnikkut ineriartortitsinerup qanoq ingerlateqqinnissaa pillugu apeqquteqaat aallaavigalugu oqallinnissamik siunnersuut.

(Siumup Inatsisartunut ilaasortai)

Tunngavilersuut:

Nunatsinnut takornariartitsineq kalaallit kulturерput inuusaaserpullu tunngavigalugit aaqqissuuttariaqalerparput.

Kalaallit Nunatsinni takornariartitsisarneq ingerlanneqarnermigut kalaalerpalunngippallaaqaaq, takornariartitsisarnermik ingerlatsineq inuiaat allat tunngavigivallaarlugit ingerlanneqarpoq taamaattumillu kalaallinit peqataaffigineqarnera aningaasarsiornikkullu innuttaasunit iluaqutigineqarnera killilerujussuulluni.

Inuiaat kalaallit sapinngisamik annertunerpaamik takornariaqarnikkut ingerlatsinermi eqeersimaarnerusumik, toqqaannarnerusumik aningaasarssiornarnerusumillu peqataanerulernissaat siunertaralugu nunatsinni ineriartortitseqqittariaqarpugut. Taamaammatt nunaqavissut isertitaqarnikkut periarfissaasa annertusarnissaat siunertaralugu takornariaqarnikkut ineriartortitsinerup qanoq ingerlateqqinnissaa pillugu apeqquteqaat aallaavigalugu oqallisissiaq matumuuna saqqummiupparput.

Nunatsinni takornariartitsisarnerup aaqqissugaanera siulersorneqarneralu kalaallit kulturitsinnik tunngaveqartariaqarpoq, takornariallu Nunatsinnut pigaangamik kalaallinit tikilluaqquneqarlutik angallanneqarlutik inuiaqatigiit pillugit nassuiaanneqartassapput.

Takornarianik sullissisussanik ilinniartitsineq inuussutissarsiutitut ingerlatsinissaq siunertaralugu ingerlanneqalertariaqapoq, takornariallu akunnittarfinni najukkaminni kalaallit tunisassiaannik misiliinissamat ullumikornit annertunerusumik periarfissaqalernissaat aaqqissuussamik ingerlanneqartariaqarpoq.

Makku anguniagassatut eqqarsaatigaavut:

1. Angallassisarnikkut kalaallit atorneqartarnerat annertusartariaqarpoq
2. Ilinniartitaaneq aqqutigalugu Kalaallit takornariartsitsisarnermut allagartartaarsinnaalertariaqarput
3. Makunuunatigut siunnersuisarneq siuarsarneqartariaqarpoq:
 - unnuisitsisarnikkut
 - kiffartuussinikkut
 - kalaaliminertortitsisarnikkut

- qimussiussisarnikkut
- niuernikkut
- oqaatsitigut piginnaasaqarnikkut
- misigisassanik takutitsisarneq

4. Kattuffik "Kalaallit Takornariatitseqatigiit" pilersinneqartariaqarpoq. Taanna aqqutigalugu akitigut pitsaassutsikkullu qulakkeerisoqarsinnaalissaaq, isumassarsioqatigiittoqarsinnaalissalluni kalaallilu soqutigisaannik qulakkeerinnilluni ingerlatsisoqarsinnaalissalluni.
5. Angerlarsimaffinni unnessiortitsinissamut periarfissat amerlisartariaqarput
6. Takornariatitsinermik ingerlatsineq takornarianillu sullissineq inuussutissarsiuutigalugu aningaasarsiorfissatut isigineqarnerusariaqarpoq
7. Nunatsinni takornarianik sullissit nunaqavissuunissaat piumasaqaataasariaqarpoq.

Nunarput isorartoorsuummat sumiiffimmiillu sumiiffimmut pissutsit atugassaasullu assigiinngitsorujussuumata Kujataani, Qeqqani, Qeqertarsuup Tunuani, Avannaani, Avanersuarmi Tunumilu pissutsit ileqqullu aallaavigalugit takornariatitsinikkut neqerooruteqartarneq siuarsarneqassasoq, aamma kommunerujussuit suleqatiginerisigut ingerlanneqartumik.

Takornariatitsineq inuiaqatigiinnut kalaallinut aningaasalersueqataassaaq taamaalillunilu Kalaallit Nunaata aningaasaqarnikkut nammineersup pilersinnissaanut peqataassalluni. Takornariatitsinermi atorfiit kalaallinik amerlanerpaanik inuttaqartinneqalernissaat sulissutigineqassaaq. Oqarnitsitut, ilinniartitsineq ineriartortitsinerlu nunatsinni najugaqavissut sulisorineqarnerulernissaannik aqqutissiuussisoq salliutinneqassaaq.

Siunertat anguniakkallu tigussaasumik tunngavilersorluakkamillu qanoq iliuusissatut pilersaaruserfigineqassapput, sakkussat tamakku eqqortut atunngikkaanni suliassaq qatangiinnarsinnaammat.

Naggataatigut Naalackersuisut kaammattussavavut matuuna saqqummiussukkavut suliat ingerlaqqinnissaanni suliassanut ilannguteqqullugit.